

IE croyois que la fin de cette lettre feroit la conclusion de ce Chapitre: mais en voicy encor vne autre qui donnera quelque iour aux precedentes, ie les couche suivant l'ordre du temps qu'elles nous sont enuoyees, sans auoir esgard s'il n'y aura point quelques redites. L'Imprimeur ne permettant pas d'en tirer vne suite de discours.

Comme ie priou le P. Isaac Jogues de nous raconter les particularitez de sa prise, & de sa captiuité, il m'a respondu qu'il en auoit escrit assez amplement: mais pource que ie m'aperois tous les iours qu'il est si reserve à parler de soy qu'il peut auoir obmis plusieurs belles particularitez, voicy ce que i'en ay tiré de sa bouche à diuerses fois. Apres le combat des Hurons qui fut bien-tost suivy de leur deffaite, ce bon Pere se trouua en lieu où il n'estoit pas hors d'esperance de se sauuer de leurs mains: mais il en perdit bien-tost la volonte: car s'estant pris garde que les principaux Chrestiens de l'Escouade, qui l'accompagnoit, estoient pris avec vn François, il appella luy-mesme, & fit venir à soy les Iroquois, auxquels il se donna genereusement, afin de pouuoir assister ces pauvres